

08 JAN 2002

KEMENTERIAN SUMBER MANUSIA AKAN KURANGKAN KARENAH BIROKRASI

PUTRAJAYA, 8 Jan (Bernama) -- Kementerian Sumber Manusia telah mengarahkan kakitangannya mencari jalan untuk mengurangkan karenah birokrasi bagi mempercepatkan pelaksanaan projek di bawah tanggungjawabnya.

Menteri berkenaan Datuk Dr Fong Chan Onn berkata langkah itu untuk memastikan peruntukan yang diberi kepada kementerian itu dapat dibelanjakan sepenuhnya sebelum akhir tahun.

"Di (Kementerian) Sumber Manusia, kami membelanjakan kira-kira 72 peratus peruntukan kami, tapi ia masih belum memuaskan. Jadi, pada tahun ini kami telah mengarahkan kakitangan kami mencari jalan untuk mengurangkan kerenah pentadbiran dan membelanjakan semua peruntukan yang disediakan untuk kementerian ini," katanya kepada pemberita di sini hari ini.

Ditanya adakah terdapat sebarang masalah hingga peruntukan yang ada tidak dapat dibelanjakan sepenuhnya, Fong berkata punca utamanya ialah masalah untuk memilih kontraktor dan memulakan sesuatu projek.

"Tapi, tahun ini kita akan mula (membelanjakan peruntukan) sejak awal (tahun) lagi," katanya.

Semalam, Perdana Menteri Datuk Seri Dr Mahathir Mohamad mengumumkan bahawa hanya 87 peratus daripada keseluruhan belanjawan pembangunan kerajaan telah dibelanjakan.

-- BERNAMA

NM AHH SP MAI